

Vie de Saint Alexis

Bons fut li siecles al tens anciënor,
quer fait i ert e justise et amor,
si ert credance, dont or n' i at nul prot ;
toz est mudez, perdude at sa color,
ja mais n' iert tels com fut as ancessors.

Al tens Noë et al tens Abraam
et al David cui deus par amat tant
bons fut li siecles, ja mais n' iert si vaillanz.
vielz est e frailes, tot s' en vait declinant,
si' st empeiriez, toz biens vait remanant.

Puis icel tens que deus nos vint salver,
nostre ancessor ourent crestientet,
si fut uns sire de rome la citet ;
riches hom fut de grant nobilitet ;
por çol vos di d' un suen fil vueil parler.

Eufemiens (ensi out nom li pedre)
cons fut de Rome del mielz qui donc i eret ;
sour toz ses pers l' amat li emperedre,
donc prist moillier vaillant et onorede
des mielz gentilz de tote la contrede.

Puis converserent ensemble longement,
qued enfant n' ourent, peiset lor en fortment ;
deu en apelent andoi parfitement ;
'e! reis celstes, par ton comandement
enfant nos done qui seit a ton talent'.

Tant li preierent par grant umilitet,
que la moillier donat feconditet :
un fil lor donet, si l' en sourent bon gref.
de saint batesme l' ont fait regenerer,
bel nom li metent solonc crestientet.

Batisiez fut, si out nom Alexis.
qui l' out portet volentiers le nodrit.
puis li bons pedre ad escole le mist ;
tant aprist letres que bien en fut guarniz.
puis vait li enfes l' emperedor servir.

Quant veit li pedre que mais n' avrat enfant
mais que cel sol cui il par amat tant,
donc se porpenset del siecle ad en avant :
or vuelte que prenget moillier a son vivant ;
donc li achatet filie adun noble franc.

Fut la pulcele de molt balt parentet,
filie ad un conte de Rome la citet ;
n' at plus enfant, lei vuelte molt onorer.
ensemble en vont li doi pedre parler ;
lor dous enfanz vuelent faire assembler.

Noment le terme de lor assemblement :
quant vint al faire, donc le font gentement.
danz Alexis l' esposat belement,